

Այսօր, երբ եկել ենք այստեղ, մէկ ամսայ արձակուրդից յետոյ, կրկին վատահուօթիւն յայտնելու մեր կառավարութեան, կրկին գնալու ժողովրդի մէջ, այդ բոլորից առաջ մենք պարտաւոր ենք այստեղ ասել ու կառավարութեան զգուշացնել, որպէսզի նա լինի հետևողական իր բոլոր գործերի մէջ, որ նա իրար համաձայնեցնի մեր երէկն, այսօրն ու վաղը, և ապա պէտք է մեր կառավարութիւնը լաւ իմանայ, որ հիւսիսից ու հարաւից, արևելքից կամ արևմուտքից բոլոր եկողները մեզ համար հաւասար թշնամիներ են, եթէ երբեք աշխատեն ոտնահարել մեր արիւնոտ անկախութիւնն ու մեր երկրի իրաւունքները (բուռն ծափահարութիւն) :

Ձեկուցման քննութիւնը վերջանում է. պատգ. Ա. Արեղեանը դաշնակցական Ֆրակցիայի կողմից առաջարկում է հետևեալ բանաձևը .

«Լսելով նախարարապետի զեկուցումը երկրի վիճակի մասին՝ մայիս 5-ից մինչև յունիս 5-ը, ինչպէս նաև քննութեան առնելով խորհրդարանի կողմից արտակարգ լիազօրութիւններով օժտած կառավարութեան գործունէութիւնն ու ձեռք առած կտրուկ միջոցները՝ վերականգնելու երկրի խաղաղութիւնն ու ժողովրդի անդորրութիւնը, նաև ապահովելու մեր հայրենիքի սահմաններն արտաքին թշնամիներից՝ խորհրդարանը տալիս է իր լիակատար հաւանութիւնն այդ ամենին, ջերմադին խրախուսում է այդ գործունէութիւնը և առաջարկում է կառավարութեան նոյն ուղիով անսայթաք և անչեղ առաջ ընթանալ այսուհետև ևս» :

Բանաձևն ընդունեց բուռն ծափահարութիւններով. դէմ ձայն տուեց էսէրական Ֆրակցիան :

Գ. Վարչամեան. — Օրէնսդրական յանձնաժողովի կողմից զեկուցում է խորհրդարանին մինչև 1920 թ. օգոստոս 1-ը արձակուրդ տալու օրինադժի մասին : Յօդաւածական քննութիւնից յետոյ օրինադժին ընդունւում է, որով խորհրդարանը ստանում է արձակուրդ մինչև 1920 թ. օգոստոս 1-ը, արձակուրդի միջոցին ընթացիկ օրէնքներ հաստատելու իր իրաւունքը վերապահում է կառավարութեան և յանձնարարում է նախադահուութեան, անհրաժեշտ պարագային, հրաւիրել արտակարգ նիստ :

Նիստը փակւում է դիշերւայ ժամը 11-ին :

ՕԳՈՍՏՈՍ 2-Ի ՆԻՍՏԸ

Նիստը բացւում է երեկոյան ժամը 7-ին : Ներկայ են զաւառից նոր վերադարձած պատգամաւորները : Դահլիճը լիքն է խուռն բազմութեամբ :

Նախադահում է փոխ-նախադահ Ա. Սահակեանը :

Օրակարգն է նախարարապետի զեկուցումը և խորհրդարանին նոր արձակուրդ տալու մասին մտցրած օրինադժի քննութիւնը :

Նախարարապետ և արտաքին գործերի նախարար Հ. Օհանջանեան. — (նախարարապետի ամբիոն երևալն ընդունւեցաւ բուռն, ազմկալից և որոտընդոտ ծափահարութիւններով) : Հայաստանի խորհրդարանի պատգամաւորներ. երեք ամիս անցաւ այն օրից, երբ դուք ինձ յանձնեցիք այս երկրի կառավարութիւնը : Առաջին փոթորկալից ամսայ մասին զեկուցումն ես տւել եմ ձեզ իր ժամանակին : Այն ամենը, ինչ կատարեց այս ամիսների ընթացքում — ունեցաւ ճակատագրական նշանակութիւն մեր պետութեան համար : Մեր հանրապետութիւնը կանգնած էր կործանման վտանգի առաջ : Բայց մեր ժողովրդի արիւթիւնը կարողացաւ ինքն իրեն փրկել, և այդ ամիսը փորձութեան ամիս դարձաւ ժողովրդի և զօրքի համար :